

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI ISNIN : 25 NOVEMBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI IKMAL HISHAM BIN ABDUL
AZIZ [TANAH MERAH]**

TARIKH : 25 NOVEMBER 2019

SOALAN

Minta **MENTERI SUMBER MANUSIA** menyatakan jumlah siswazah yang masih menganggur sejak dua tahun lalu dan apakah puncanya.

JAWAPAN

Tuan Yang di-Pertua,

1. Pencari kerja yang berdaftar dengan Portal *JobsMalaysia*, Kementerian Sumber Manusia sehingga Oktober 2019, seramai 290,898 orang pendaftar aktif pencari kerja yang terdiri seramai 210,868 orang siswazah. Manakala kekosongan pekerjaan yang didaftarkan oleh majikan-majikan ialah sebanyak 847,010 jawatan kosong yang terdiri daripada sebanyak 69,293 kekosongan untuk kategori siswazah dan sebanyak 777,717 kekosongan jawatan bagi kategori pekerjaan bukan siswazah di pelbagai jawatan sektor awam dan swasta dalam negara.

2. Melalui pelbagai program-program penempatan pekerjaan yang dijalankan bagi tempoh Januari hingga Oktober 2019, seramai 137,333 orang pencari kerja yang terdiri dari 41,090 orang siswazah telah berjaya ditempatkan di pelbagai sektor industri.

Tuan Yang di-Pertua,

3. Pengangguran siswazah ini adalah sebahagian daripada proses peralihan biasa bagi siswazah daripada universiti untuk memasuki ke alam pekerjaan dan pelbagai usaha diambil untuk membantu mereka mendapatkan pekerjaan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN RAMLI BIN DATO' MOHD NOR

TARIKH : 25 NOVEMBER 2019 (ISNIN)

SOALAN NO. 2

Minta **MENTERI AIR, TANAH DAN SUMBER ASLI** menyatakan penjelasan berkaitan isu kebersihan di Sungai Ichat, Parit Fall dan Robinson Fall di Cameron Highlands yang kian tercemar. Nyatakan tindakan yang diambil oleh pihak Kementerian supaya sungai-sungai ini dapat dipelihara serta dibersihkan untuk dibuka kembali sebagai salah satu tempat tarikan pengunjung ke Cameron Highlands.

JAWAPAN

Tuan Yang di-Pertua,

Isu pencemaran Sg Ichat, Parit Fall dan Robinson Fall adalah berpunca daripada sikap warga setempat yang tidak prihatin dalam menjaga kebersihan alam sekitar terutamanya sumber air. Sg Ichat terletak di dalam kawasan tanaman persendirian manakala Parit Fall dan Robinson Fall berada di hulu kawasan pertanian. Pencemaran di kawasan ini adalah disebabkan oleh sisa-sisa pertanian.

Perkara berkaitan dengan pengurusan sumber air terletak di bawah bidang kuasa negeri selaras dengan Perlembagaan Persekutuan. Setiap negeri mempunyai perundangan berkaitan sumber air yang tersendiri termasuk hal-hal berkaitan dengan larangan pencemaran di kawasan sumber air yang membolehkan penguatkuasaan dilaksanakan.

Dalam aspek pemuliharaan sungai yang dilaksanakan oleh Jabatan Pengairan dan Saliran, KATS selaku kementerian memberi **perhatian secara khusus mengenai isu pembersihan serta mendalamkan parit/sungai untuk mengurangkan risiko banjir sahaja.**

Skop kerja yang terlibat di bawah program tersebut adalah kerja pengorekan sungai, muara sungai, pembinaan struktur hakisan tebing sungai, membuang kelodak, sampah, sisa pepejal, pemotongan rumput, menaik taraf dan menyelenggara aset/ struktur kawalan banjir yang bertujuan mengurangkan risiko banjir. Di bawah program ini, KATS **membantu Kerajaan Negeri** dengan menyalurkan peruntukan bagi

NO SOALAN : 2

melaksanakan **kerja-kerja untuk mengurangkan risiko banjir** di seluruh Negara.

Bagi menangani isu di ketiga-tiga sungai ini, penguatkuasaan serta kawalan pencemaran di punca (*control at source*) perlu dilaksanakan oleh Pihak Kerajaan Negeri dan Pihak Berkuasa Tempatan (PBT) bagi menangani isu pencemaran sungai dengan cara mendidik warga setempat untuk melihat kepentingan dan keperluan menjaga sumber air dan impak yang bakal dihadapi sekiranya pencemaran sungai terus berlaku. Para petani juga seharusnya digalakkan untuk mengamalkan *Good Agricultural Practice (GAP)* bagi mengawal sisa pencemaran sebelum masuk ke sungai.

Usaha bagi mengatasi isu pencemaran di kawasan berkenaan melibatkan pelbagai agensi seperti Pihak Berkuasa Tempatan (PBT), Pejabat Tanah Dan Galian (PTG), NGO dan juga masyarakat setempat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. HASSAN BIN BAHROM
[TAMPIN]**

TARIKH : 25 NOVEMBER 2019 [ISNIN]

SOALAN

Minta **MENTERI HAL EHWAL EKONOMI** menyatakan sejauh manakah kemajuan yang telah dilakukan oleh Kementerian dalam proses membaik pulih perumahan generasi kedua FELDA yang terbengkalai. Apakah ada tindakan baru yang dilakukan oleh Kementerian dalam memastikan generasi kedua FELDA ini mendapat rumah dan adakah Kementerian mempunyai data yang tepat berkenaan keperluan perumahan di kalangan generasi kedua FELDA.

JAWAPAN

Tuan Yang di-Pertua,

1. Untuk makluman Ahli Yang Berhormat, projek Perumahan Generasi Baharu FELDA (PGBF) telah diumumkan semasa pembentangan Bajet 2013 dengan sasaran pembinaan 20,000 unit rumah dalam tempoh 5 tahun dan melibatkan peruntukan sebanyak RM1.5 bilion. Walau bagaimanapun, sehingga tahun 2018, Kerajaan terdahulu hanya menyalurkan sejumlah RM200 juta untuk FELDA melaksanakan projek tersebut. Dengan peruntukan terhad, FELDA hanya mampu meneruskan pembinaan 38 projek PGBF melibatkan 8,314 unit rumah sahaja.

NO. SOALAN : 3

2. Melalui pembentangan Kertas Putih FELDA, Kerajaan telah meluluskan peruntukan geran sebanyak RM250 juta kepada FELDA untuk menyiapkan 20 tapak projek Perumahan Generasi Baru Felda (PGBF). Ini melibatkan 4,794 unit rumah yang tahap kemajuan kerja telah mencapai 70% dan ke atas.
3. Sehingga kini, daripada 20 projek tersebut, sebanyak 9 projek yang melibatkan 1,698 unit rumah telah mendapat pentaulihan Perakuan Siap dan Pematuhan (*Certificate of Completion and Compliance-CCC*). Daripada jumlah tersebut, 1,070 unit rumah atau 63 peratus, telah diserahkan kunci manakala 628 unit masih dalam proses penyerahan kepada peserta.
4. Di samping itu, terdapat 11 projek melibatkan 3,096 unit rumah masih dalam pembinaan. Sebanyak 660 unit dijangka dapat disiapkan dan diserahkan pada bulan Disember 2019 dan baki sebanyak 2,436 unit akan disiapkan secara berperingkat pada tahun 2020.
5. Usaha Kerajaan untuk menyiapkan rumah-rumah yang terbengkalai ini akan dapat memberikan manfaat langsung kepada generasi baharu FELDA. Tumpuan Kerajaan pada masa ini adalah untuk menyiapkan projek PGBF yang berada pada tahap kemajuan kerja 70% ke atas. FELDA juga sedang menjalankan Penilaian *Outcome* sebagai satu kaedah untuk mengukur prestasi dan pencapaian projek PGBF yang telah dilaksanakan. Data daripada hasil kajian ini dijangka akan dapat membantu FELDA menyediakan pelan tindakan yang lebih komprehensif dan mampan dalam menyelesaikan isu perumahan generasi baharu FELDA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB DATO' HAJAH SITI ZAILAH BINTI MOHD
YUSOFF (RANTAU PANJANG)**

TARIKH : 25 NOVEMBER 2019 (ISNIN)

SOALAN

Minta **PERDANA MENTERI** menyatakan apakah jaminan pelaksanaan Dasar Rahmatan Lil Alamin sebagai dasar pentadbiran Islam baharu negara akan mampu meningkatkan martabat syariat Islam dan membela hak umat Islam.

**JAWAPAN: (YB PUAN HAJJAH FUZIAH SALLEH, TIMBALAN
MENTERI DI JABATAN PERDANA MENTERI)**

Tuan Yang di-Pertua,

1. Aspirasi Kerajaan untuk merealisasikan Dasar Rahmatan Lil Alamin sebagai dasar yang inklusif dalam pentadbiran Islam di Malaysia telah diperakui dan diluluskan oleh Mesyuarat Majlis Kebangsaan Bagi Hal Ehwal Ugama Islam Malaysia (MKI) kali ke-65 yang dipengerusikan oleh YAB Perdana Menteri pada 14 Mac 2019. Keputusan MKI ini seterusnya telah diperkenankan oleh Mesyuarat Majlis Raja-Raja ke-254 pada 4 Julai 2019. Bagi memantapkan pelaksanaan dasar ini dari aspek pengurusan dan pentadbiran merentas pelbagai agensi di peringkat pusat dan negeri, pada 25 Oktober 2019, Mesyuarat Jemaah Menteri telah bersetuju terhadap pelaksanaan dasar pentadbiran melalui pendekatan Rahmatan Lil

NO. SOALAN : 4

Alamin untuk dilaksanakan ke arah mewujudkan kehidupan yang lebih harmoni dan sejahtera dalam kalangan rakyat pelbagai agama dan bangsa di negara ini.

2. Bagi merealisasikan matlamat dasar pentadbiran Rahmatan Lil Alamin ini, Kerajaan sedang merangka sebuah *Blue Print* Negara Rahmah yang menggariskan ciri-ciri sebuah masyarakat dan negara yang menjadi matlamat Rahmatan Lil Alamin, iaitu:

- a. Sebuah negara yang dinaungi dengan pentadbiran dan kepimpinan yang berintegriti, tadbir urus baik, memiliki masyarakat yang berilmu, berakhlak dan penyayang;
- b. Hubungan etnik dan penganut pelbagai agama yang harmoni, kedudukan ekonomi yang mampan, pembangunan dan alam sekitar yang lestari;
- c. Kebajikan dan keselamatan rakyat terpelihara serta bersifat menyantuni kemanusiaan, ihsan dan peradaban bermatlamatkan kesejahteraan sejagat.

Aspirasi yang terkandung dalam *Blue Print* Negara Rahmah ini juga adalah seiring dengan matlamat Wawasan Kemakmuran Bersama 2030 (WKB2030) dan agenda antarabangsa 17 Matlamat *Sustainable Development Goals (SDGs)*. *Blue Print* ini telah meletakkan lima (5) prinsip Maqasid Syariah iaitu Menjaga Agama, Nyawa, Akal, Keturunan dan Harta sebagai Prinsip Panduan bagi memastikan segala perancangan dan halatuju bergerak seiring dengan Syariat Islam.

Bagi sesi libat urus pula, sebanyak sembilan sesi libat urus telah diadakan bersama kementerian/ jabatan dan agensi iaitu Kementerian Kesihatan Malaysia, Kementerian Pendidikan Malaysia, Kementerian Pembangunan Wanita Keluarga dan Masyarakat, Kementerian Kewangan Malaysia, Kementerian Pertahanan, Taska berteraskan Maqasid Syariah, Aplikasi Maqasid dalam MS1900 bersama Jabatan Standard Malaysia, Kementerian Komunikasi dan Multimedia dan Kementerian Luar Negara.

3. Dasar Pentadbiran Islam melalui Pendekatan RAHMAH bukanlah bertujuan menghapuskan hak orang Islam atau melonggarkan mana-mana undang-undang yang menjamin kepentingan Islam sebagaimana yang termaktub dalam Perkara 3 (1) Perlembagaan Persekutuan. Malah dengan terlaksananya dasar ini ia dijangka akan berupaya mengangkat martabat Islam dan umatnya kerana nilai- nilai Rahmatan Lil Alamin sebagaimana yang ditunjukkan oleh Rasulullah SAW dan prinsip- prinsip maqasid syariah akan dijadikan asas dalam pembentukan dasar kerajaan sekali gus mampu memberi implikasi positif terhadap pentadbiran negara dalam memartabatkan syiar Islam dan membela hak umat Islam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN PRABAKARAN A/L M PARAMESWARAN
[BATU]**

TARIKH : 25 NOVEMBER 2019 (ISNIN)

SOALAN

Minta **MENTERI WILAYAH PERSEKUTUAN** menyatakan pembangunan yang pesat dan tidak terkawal menyebabkan tidak berlaku keseimbangan di antara kawasan penduduk dan kawasan hijau. Adakah Kementerian telah mengambil kira keadaan trafik, alam sekitar, infrastruktur dan sosial ketika kelulusan diberikan kepada pemaju sesuatu kawasan.

JAWAPAN

Tuan Yang di-Pertua,

Untuk makluman Yang Berhormat Batu, di dalam menilai sesuatu permohonan perancangan, Dewan Bandaraya Kuala Lumpur (DBKL) akan merujuk kepada Pelan Bandar Raya Kuala Lumpur 2020 yang telah diwartakan sebagai dokumen rujukan utama dalam membuat keputusan dan memberi kelulusan berkenaan dengan permohonan kebenaran perancangan yang diterima.

Selain dari itu dalam mempertimbangkan cadangan pembangunan yang diterima, pelbagai kriteria penilaian perancangan perlu diambil kira bagi memastikan pemprosesan permohonan dinilai secara menyeluruh dan

SOALAN NO : 5

tepat oleh pihak DBKL. Antara perkara yang disebutkan, ialah syarat-syarat yang ditentukan sebelum kelulusan, akan ditentukan cadangan-cadangan seperti jajaran jalan dan kelebaran jalan, lorong-lorong persimpangan jalan, garis-garis bangunan, jenis-jenis bangunan, ketinggian bangunan, kepadatan pembangunan, nisbah plot kawasan lapang, padang, rizab sekolah, rizab sungai dan perparitan, rizab pembentungan, kemudahan-kemudahan awam, surau dan masjid, rumah ibadat dan sebagainya.

Sekiranya pihak DBKL menerima permohonan cadangan pembangunan yang akan menyumbang kepada penjana trafik yang tinggi, syarat penyediaan *Traffic Impact Assessment* (TIA) akan dikenakan kepada pemohon untuk dikemukakan.

Input daripada laporan TIA tersebut yang merupakan ramalan impak trafik yang akan dijana masa depan oleh pembangunan yang dicadangkan hendaklah diambilkira oleh pihak pemaju dalam membuat penambahbaikan infrastruktur sediaada di kawasan tersebut bagi menampung pembangunan yang dicadangkan.

Selain daripada itu, bagi kawasan-kawasan sensitiviti alam sekitar yang melibatkan kawasan bukit dan cerun, pihak pemaju akan disyaratkan untuk mematuhi Garis Panduan Perancangan Aspek Kawalan Perancangan Pembangunan Di Kawasan Lereng Bukit bagi memastikan kawalan yang dikenakan ke atas pembangunan di kawasan ini. Ianya juga bagi memastikan cadangan pembangunan di kawasan tidak memberi impak yang negatif kepada kawasan persekitaran.

Serahan bagi pelan-pelan perparitan, parit-parit induk dan kolam-kolam tadahan air hujan adalah berdasarkan kepada cadangan Sistem Pengurusan Air Hujan ataupun MSMA iaitu Manual Saliran Mesra Alam bagi mengatasi banjir kilat atau limpahan air di kawasan-kawasan pembinaan atau kawasan-kawasan sekitarnya.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB DATO' SRI DR. HAJI ISMAIL BIN HAJI
ABD. MUTTALIB [MARAN]**

TARIKH : 25 NOVEMBER 2019

SOALAN

Minta **MENTERI SUMBER MANUSIA** menyatakan pembangunan dalam TVET merupakan usaha penting untuk peningkatan guna tenaga negara. Sejauh manakah pelaksanaan TVET yang telah dilaksanakan oleh Kerajaan dahulu yang melibatkan tujuh Kementerian atau apakah terdapat perubahan dasar baru dalam perkara ini.

JAWAPAN

Tuan Yang di-Pertua,

1. Kementerian Sumber Manusia (KSM) melalui Akta Pembangunan Kemahiran Kebangsaan (Akta 652) telah mewujudkan Majlis Pembangunan Kemahiran Kebangsaan untuk memperkasakan TVET. Hasil daripada kajian yang telah dilaksanakan oleh Kementerian Sumber Manusia (KSM) bersama *Pricewaterhouse Coopers*, telah menyediakan satu *blueprint* bagi memperkasakan TVET dan mengambil langkah-langkah yang perlu bagi pembangunan modal insan yang di pacu oleh industri.

2. Di samping itu, Jawatankuasa Khas (Kabinet) Pemerkasaan TVET (JKKPTVET) telah ditubuhkan dipengerusikan oleh Yang Berhormat Menteri Pendidikan dan turut dianggotai oleh 9 kementerian dan 9 orang Menteri ahli iaitu YB Menteri Sumber Manusia, YB Menteri Belia dan Sukan, YB Menteri Pembangunan Luar Bandar, YB Menteri Perdagangan Dalam Negeri dan Hal Ehwal Pengguna, YB Pembangunan Usahawan, YB Menteri Pertanian dan Industri Asas Tani dan YB Menteri Kerja Raya bersama-sama wakil dalam industri bagi menentukan hala tuju TVET negara menghadapi revolusi industri 4.0.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN SYED IBRAHIM BIN SYED NOH

KAWASAN : LEDANG

TARIKH : 25 NOVEMBER 2019 (ISNIN)

SOALAN

minta **PERDANA MENTERI** menyatakan apakah inisiatif Kerajaan untuk meningkatkan semangat patriotik dan cintakan negara serta apakah tindakan Kerajaan terhadap mereka yang mempertikaikan tugas dan tanggungjawab sultan, tentera, polis dan lain-lain.

JAWAPAN : YB SENATOR TUAN WAYTHA MOORTHY A/L PONNUSAMY, MENTERI DI JABATAN PERDANA MENTERI (PERPADUAN NEGARA DAN KESEJAHTERAAN SOSIAL)

Yang di-Pertua,

Dalam usaha Kerajaan bagi meningkatkan semangat patriotik dan cintakan negara, Kerajaan melalui Jabatan Perpaduan Negara dan Integrasi Nasional (PERPADUAN) telah melaksanakan pelbagai inisiatif seperti berikut :

- (i) Menyemai nilai-nilai murni dan nilai-nilai kebersamaan kepada lebih 35,000 orang kanak-kanak di bawah umur 6 tahun melalui 1,781 buah Tabika Perpaduan di seluruh negara agar mereka dididik dan dibimbing mengenai kepelbagaian yang wujud di negara ini agar nilai-nilai murni dapat dipupuk dalam kalangan mereka sejak dari peringkat awal;

- (ii) Pelbagai program dilaksanakan untuk menyemai rasa cinta akan negara dan memupuk semangat perpaduan dan keharmonian dalam kalangan generasi muda melalui penubuhan Kelab Rukun Negara (KRN) di peringkat sekolah dan Sekretariat Rukun Negara (SRN) di institusi pengajian tinggi awam dan swasta dengan kerjasama Kementerian Pendidikan Malaysia;
- (iii) Aktiviti silang budaya seperti Kem Silang Budaya dan 1SRN 1Komuniti turut dilaksanakan melalui KRN dan SRN bagi memberi pendedahan, penerapan serta penghayatan terhadap prinsip Rukun Negara secara praktikal kepada generasi muda melalui penggunaan Modul Silang Budaya bagi menggalakkan interaksi dan komunikasi dalam amalan hidup seharian;
- (iv) Kerjasama strategik dan kolaborasi dengan Kementerian Pendidikan Malaysia terus digerakkan melalui Program Rancangan Integrasi Murid Untuk Perpaduan (RIMUP) yang memberi tumpuan kepada pelaksanaan program mengikut kluster dan secara bersepadu bagi meningkatkan kefahaman dan penghayatan terhadap lima (5) Prinsip Rukun Negara;
- (v) Menggalakkan silang kerjaya dan kefahaman budaya di syarikat-syarikat swasta dan *Government Linked Companies* (GLCs) melalui penyertaan mahasiswa bumiputera dan bukan bumiputera dalam Program Latihan Industri Perpaduan (PLIP) yang merupakan satu platform bagi para mahasiswa lebih memahami mengenai kepelbagaian masyarakat Malaysia apabila melangkah ke dunia pekerjaan sebenar yang lebih mencabar;
- (vi) Mewujudkan jaringan kerjasama strategik dengan badan-badan bukan kerajaan (NGO), badan-badan korporat, syarikat-syarikat swasta dan *Government Linked Companies* (GLCs) dalam melaksanakan program-program yang menyemarakkan semangat patriotisme seperti *Merdeka Fun Run*, *Run for Unity*, *Say Something Nice*, *Raising National Flag*, *Merdeka Fiesta*, Konvoi Muhibah yang bertujuan menyebarkan mesej dan slogan perpaduan dan cintakan negara.

Pada masa yang sama, Kerajaan akan sentiasa mempertahankan kedaulatan Institusi Diraja serta tugas dan tanggungjawab pasukan tentera dan polis seperti yang termaktub dalam Perlembagaan dan undang-undang sedia ada. Sistem kenegaraan Malaysia ini telah berjalan dengan baik selama 62 tahun sehinggakan Malaysia telah maju ke depan melalui pembangunan yang pesat, mempunyai sistem pertahanan dan keselamatan negara yang baik dan telah menunjukkan prestasi yang baik dalam banyak aspek di persada antarabangsa, maka ini membuktikan bahawa semangat kesetiaan rakyat kepada Raja dan Negara dan kepercayaan rakyat terhadap badan-badan beruniform telah terpelihara sekian lama dan akan terus dimartabatkan di bawah Malaysia Baharu.

Kerajaan juga turut menggalakkan media massa supaya menyebarkan pemahaman mengenai Institusi Diraja, kerjaya tentera dan polis kepada rakyat agar Institusi dan pasukan beruniform ini sentiasa dihormati dan dipandang tinggi. Selain itu, kerajaan juga akan mendakwa di mahkamah di bawah undang-undang yang sedang berkuat kuasa mana-mana pihak yang sengaja mempertikaikan tugas dan tanggungjawab sultan, tentera, polis dan lain-lain sehingga menimbulkan sensitiviti kaum dan agama dan membawa kepada kebencian, kebimbangan dan kegusaran rakyat dan perpecahan dalam negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 25 NOVEMBER 2019 (ISNIN)

SOALAN NO. 8

Minta **MENTERI AIR, TANAH DAN SUMBER ASLI** menyatakan perkembangan projek Pembangunan Lembangan Sungai Bersepadu di Sungai Kemaman dan bila projek ini dijangka siap.

JAWAPAN

Tuan Yang di-Pertua,

Kerajaan telah meluluskan Projek Pembangunan Lembangan Sungai Bersepadu (PLSB) Sungai Kemaman untuk dilaksanakan oleh Kementerian Air, Tanah dan Sumber Air (KATS) melalui Jabatan Pengairan dan Saliran (JPS) dalam RMKe-11 dengan siling kos projek sebanyak RM300 juta.

Projek tersebut masih dalam peringkat reka bentuk dan penyediaan dokumen tender serta memuktamadkan jajaran pengambilan tanah. Pelaksanaan kerja-kerja fizikal bagi projek ini dijangka akan dimulakan pada tahun 2021 di mana tempoh pelaksanaan projek adalah tiga tahun.

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN HAJI YAMANI HAFEZ BIN MUSA
[SIPITANG]**

TARIKH : 25 NOVEMBER 2019 (ISNIN)

SOALAN

Minta **MENTERI BELIA DAN SUKAN** menyatakan apakah perancangan untuk agenda pembangunan belia secara menyeluruh, termasuk penyediaan kemudahan sukan di luar bandar seperti menentukan "satu daerah, satu kompleks sukan" memandangkan belia sebagai pelapis pimpinan masa depan.

JAWAPAN

Yang di-Pertua,

1. Malaysia perlu bersedia untuk pelaksanaan undi 18 dan belia 30 yang akan melibatkan penambahan 7 juta pengundi muda dan kita mengkategorikan anak muda di bawah umur 30 tahun untuk memastikan Kementerian dapat meremajakan pertubuhan-pertubuhan belia seterusnya dapat mencungkil bakat-bakat mereka pada umur yang lebih muda. Dengan itu, ada beberapa perkara yang akan Kementerian Belia dan Sukan (KBS) lakukan untuk memastikan bahawa kepimpinan anak muda itu dapat diserlahkan pada umur yang muda.

2. Pertama sekali adalah dengan pelaksanaan *Malaysia Future Leaders School* (MFLS), iaitu, dalam tempoh masa enam bulan, Kementerian telah berjaya melatih sekitar 26,000 anak muda di 22 buah Kem Wawasan di seluruh Malaysia bersama juga dengan kem PLKN yang turut diguna pakai

oleh Kementerian. Inisiatif ini adalah untuk melatih anak muda supaya berfikiran kritis, bergaya kepimpinan, *team building*, berbilang bangsa dan agama supaya anak muda ini dapat mewakili negara pada masa akan datang.

3. Selain itu, pelaksanaan dana belia atau geran belia telah direformasikan di mana ia tertumpu kepada pelaksanaan program dan bukan sahaja kepada dana pentadbiran semata-mata. Kementerian juga memberikan *matching incentive* kepada pertubuhan-pertubuhan belia yang merangkumi lebih banyak wanita, membawa masuk lebih ramai kepimpinan belia di bawah 30 tahun dan pada masa yang sama mempunyai kepimpinan berbilang bangsa juga agama. Ini merupakan tiga insentif yang akan diberikan kepada mereka.

4. Kementerian juga melipat gandakan usaha untuk mencungkil kepimpinan anak muda melalui program Felo Perdana, Felo Korporat dan juga parlimen belia pada tahun akan datang dari kategori sekolah dan juga wanita khususnya untuk memastikan supaya suara mereka tidak akan disampingkan.

5. Di samping itu, Kementerian juga tidak melupakan kumpulan belia berisiko. Pada tahun akan datang, Kementerian akan memperkasakan program Riben Kuning dan peluang kedua akan diberikan kepada kumpulan belia berisiko khususnya. Anak muda ini akan diberikan laluan khas untuk menyertai institusi TVET negara sama ada melibatkan program diploma dua (2) tahun atau kursus jangka masa pendek yang akan memastikan mereka mendapat pekerjaan-pekerjaan khususnya dalam sektor swasta dengan jalinan dengan syarikat gergasi seperti MRCB.

6. Dalam industri sukan, khususnya dalam membangunkan sukan luar bandar, Kementerian akan memperhebatkan agihan infra sukan yang akan difokuskan di kawasan luar bandar dan juga kawasan separa bandar yang mempunyai kumpulan belia berisiko yang paling tinggi dengan sistem *traffic light* yang akan kita wujudkan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK SERI HAJI AHMAD BIN HAJI
MASLAN [PONTIAN]**

TARIKH : 25 NOVEMBER 2019 (ISNIN)

SOALAN

Minta **MENTERI HAL EHWAL EKONOMI** menyatakan jumlah secara terperinci aset negara yang telah dijual kepada kepentingan asing dalam bentuk peratusan dan ringgit sama ada oleh Khazanah, PNB, KWSP, Petronas, Sime Darby, LTAT, TH, FELDA atau entiti yang lain mulai 10 Mei 2018 hingga hari ini. Berapa pula aset yang dibeli oleh entiti tersebut dalam tempoh ini.

JAWAPAN

Tuan Yang di-Pertua,

1. Untuk menjawab soalan Ahli Yang Berhormat, Kementerian Hal Ehwal Ekonomi (MEA) akan menumpukan kepada institusi yang berada di bawah bidang tanggung jawab kementerian ini iaitu Khazanah Nasional Berhad, PETRONAS dan FELDA.
2. Bagi tempoh Mei 2018 hingga sekarang, aset yang telah dijual kepada kepentingan asing oleh Khazanah hanya melibatkan dua pelupusan sahaja iaitu 16% pegangan dalam IHH Healthcare Berhad (IHH) bernilai RM8.42 bilion dan sebahagian daripada pembangunan bersepadu Duo di Singapura melalui pegangan dalam M+S Pte Ltd bernilai 1.575 bilion dolar Singapura.

3. Pelupusan-pelupusan ini telah dijelaskan oleh Yang Berhormat Menteri semasa Penggulangan Peringkat Dasar untuk Belanjawan 2020. Tiada pelupusan kepada pihak asing yang dilaksanakan oleh PETRONAS dan FELDA dalam tempoh berkenaan.

4. Antara Mei 2018 hingga Jun 2019, Khazanah telah melaksanakan 6 pelaburan baharu dalam pelbagai sektor termasuk dalam pasaran awam di India dan China. Jumlah keseluruhan pelaburan ini adalah sebanyak RM6.4 bilion. Pelaburan tersebut adalah seperti berikut:

Bil.	Tarikh	Syarikat	Nilai (RM)
i.	Mei – Disember 2018	Ant Financial Co.	2,552 juta
ii.		IHH Healthcare	1,442 juta
iii.		Prince Court Medical Center	1,087 juta
iv.		CIMB Group	635 juta
v.	Januari – Jun 2019	Pasaran Awam – China	553 juta
vi.		Pasaran Awam - India	84 juta

5. Bagi PETRONAS pula, pada April tahun ini, PETRONAS telah melaksanakan pembelian saham dalam sebuah syarikat berpangkalan di Singapura, Amplus Energy Solutions Pte. Ltd., sebagai satu langkah strategik PETRONAS untuk mengembangkan perniagaan serta memasuki pasaran industri hiliran *Renewable Energy* (RE), dengan izin.

Sekian, terima kasih.

PEMBERITAHUAN PERTANYAAN BAGI JAWAPAN LISAN

MESYUARAT KETIGA, PENGGAL KEDUA,

PARLIMEN KE-14 DEWAN RAKYAT

PERTANYAAN : LISAN

DARIPADA : TUAN AWANG HUSAINI BIN SAHARI [PUTATAN]

TARIKH : 25 NOV 2019 (ISNIN)

SOALAN

TUAN AWANG HUSAINI BIN SAHARI [PUTATAN] minta **MENTERI INDUSTRI UTAMA** menyatakan **apakah** Kementerian berhasrat untuk **meluaskan lagi skop skim pinjaman kepada pekebun-pekebun kecil kelapa sawit** di negeri **Sabah** yang pada ketika ini skim ini hanya dihadkan kepada Skim Tanam Semula dengan nilai peruntukan yang diberikan oleh Kementerian sebanyak RM500 juta dengan kadar 2%. Jika dahulu peruntukan ini juga diluaskan kepada dua bidang kelapa sawit iaitu Skim Tanaman Semula dan juga Skim Tanam Baru, saya membawa suara negeri Sabah agar skim pinjaman ini juga diberikan untuk tanaman baru khusus untuk negeri Sabah.

JAWAPAN

Tuan Yang Di-Pertua,

Buat masa ini, Kementerian belum ada cadangan untuk meluaskan skop skim pembiayaan bagi tanaman semula kepada skim tanaman baru untuk para pekebun kecil kelapa sawit. Ini adalah kerana aktiviti perluasan penanaman sawit dilihat bukan lagi langkah utama yang efektif dalam meningkatkan pengeluaran hasil sawit negara. Langkah yang sedang diambil perhatian oleh Kementerian adalah meningkatkan produktiviti pengeluaran hasil sawit negara melalui penggunaan sumber sedia ada tanpa penambahan perluasan kawasan baru yang telah menimbulkan pelbagai polemik dan tuduhan tidak berasas dari negara-negara luar.

Untuk makluman, Kerajaan telah menetapkan had keluasan tanaman sawit adalah pada 6.5 juta hektar sahaja untuk memastikan industri sawit tidak lagi dikaitkan isu penyahhutan. Justeru, pada masa ini, pembukaan kawasan baru untuk tanaman sawit adalah bukan keutamaan bagi Kementerian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : DATO' SRI REEZAL MERICAN BIN NAINA
MERICAN [KEPALA BATAS]
TARIKH : 25 NOVEMBER 2019

SOALAN NO. 12

Minta **PERDANA MENTERI** menyatakan anggaran sampai bilakah Kerajaan mampu untuk menggunakan skim pencen kepada pegawai-pegawai Kerajaan dan adakah terdapat skim yang lebih baik berbanding skim pencen untuk menanggung pesara-pesara Kerajaan.

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JABATAN PERDANA MENTERI

Yang di-Pertua,

1. Pada waktu ini, Kerajaan masih mampu dan tidak berhasrat untuk menghapuskan skim pencen penjawat awam yang sedia ada.
2. Pada tahun 2006, perbelanjaan faedah persaraan (pencen, ganjaran, GCR dan kemudahan perubatan percuma) adalah sebanyak RM5.86 bilion telah meningkat kepada RM23.87 bilion pada tahun 2018. Jumlah ini dijangka akan meningkat setiap tahun. Kerajaan penuh sedar, kemampuan Kerajaan untuk membiayai faedah persaraan adalah bergantung kepada sumber pendapatan Kerajaan.
3. Setakat ini, cadangan mekanisme baharu Skim Pencen Perkhidmatan Awam masih dalam peringkat kajian dan sedang diperhalusi di bawah Kajian Pembaharuan Perkhidmatan Awam. Langkah pelaksanaan yang sesuai juga sedang dikaji dan diteliti oleh pihak Kerajaan bertujuan untuk mengoptimumkan perbelanjaan Kerajaan dan memastikan kebajikan penjawat awam sentiasa terjamin.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

**DARIPADA : PUAN JUNE LEOW HSIAD HUI
(HULU SELANGOR)**

TARIKH : 25 NOVEMBER 2019 (ISNIN)

SOALAN

Minta **MENTERI PENGANGKUTAN** menyatakan justifikasi perkhidmatan bas mini diperkenalkan semula setelah lama dihentikan. Adakah perkhidmatan bas mini masih sesuai beroperasi dalam keadaan kesesakan trafik yang teruk.

JAWAPAN

Yang di-Pertua,

1. Untuk makluman Yang Berhormat, perkhidmatan bas berhenti-henti (stage bus) mengalami pelbagai cabaran termasuk kos operasi yang semakin meningkat di samping permintaan para penumpang dan rakyat agar harga tiket bas dikekalkan pada kadar yang berpatutan. Umum diketahui juga rangkaian pengangkutan awam khususnya di Lembah Kelang masih mempunyai kekurangan dari segi kebolehcapaian *first mile* dan *last mile* untuk menghubungi para pengguna dari rumah atau pejabat ke stesen rel atau keretapi yang terdekat. Perkhidmatan bas berhenti-henti selalunya tidak dapat menembusi kawasan perumahan yang padat kerana jalan yang sempit di kawasan berkenaan sukar dilalui oleh kenderaan bas biasa yang saiz besar.

2. Oleh demikian, cadangan memperkenalkan bas yang lebih kecil iaitu dari panjang 7 meter hingga 10 meter (berbanding saiz bas biasa 12 meter) mula dilaksanakan oleh situasi oleh Prasarana Malaysia melalui beberapa projek perintis di laluan-laluan yang dikenalpasti. Ini adalah untuk mencari formula penyelesaian kepada kesinambungan perjalanan atau “*connectivity*” untuk “*First mile*” di laluan-laluan strategik tempatan khususnya di laluan yang melalui jalan-jalan sempit di kawasan-kawasan penempatan tinggi dan padat seperti di kawasan Projek Perumahan Rakyat (PPR), kampung tradisi, kampung baru dan sebagainya.

3. Perkhidmatan bas mini ini perlu mematuhi piawaian mutu perkhidmatan dan syarat-syarat yang ketat yang dikawal selia oleh Agensi Pengangkutan Awam Darat (APAD). Perkhidmatan tersebut dijangka tidak beroperasi di kawasan yang mengalami kesesakan trafik yang teruk kerana ianya difokuskan di laluan-laluan tempatan sahaja dan bukan di koridor utama.

4. Kini, perkhidmatan bas mini di dalam tempoh percubaan yang dioperasikan oleh Rapid KL bagi tiga (3) laluan tempatan iaitu T300 (Bukit Indah – Ampang Point melalui Jalan Rasmi), T304 (Bukit Indah – Ampang Point melalui Jalan Ampang) dan T784 (LRT Taman Bahagia – Damansara Utama). Statistik yang dikumpul sejak bermulanya tempoh percubaan baru-baru ini pada Oktober 2019 menunjukkan peningkatan yang positif dari segi bilangan pengguna dan maklum balas yang baik dari kalangan para penumpang.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB DATO' HAJI CHE ABDULLAH BIN MAT
NAWI [TUMPAT]**

TARIKH : 25 NOVEMBER 2019

SOALAN

Minta **MENTERI SUMBER MANUSIA** menyatakan cadangan pindaan undang-undang perburuhan bagi menguatkuasa Garis Panduan Solat Dalam Waktu Kerja.

JAWAPAN

Tuan Yang Di-Pertua,

1. Kementerian Sumber Manusia telah bekerjasama dengan Jabatan Kemajuan Islam Malaysia (JAKIM) bagi menyediakan Garis Panduan Solat Dalam Waktu Kerja sebagai panduan kepada majikan bagi memudahkan pelaksanaan penyelarasan komitmen kerja dengan kewajipan pekerja menunaikan solat dan juga keperluan majikan untuk menyediakan tempat solat yang sesuai. Penyelarasan garis panduan ini telah mengambil kira peraturan-peraturan yang terdapat dalam Akta dan Enakmen-Enakmen Jenayah Syariah Wilayah/Negeri yang menyatakan kesalahan tidak menunaikan solat jumaat sebagai satu kesalahan yang boleh dikenakan hukuman denda dan penjara.
2. Garis panduan tersebut hanya terpakai kepada pekerja-pekerja beragama Islam sebagai langkah untuk mewujudkan keharmonian perusahaan serta persekitaran komuniti industri yang majoritinya beragama Islam bahawa terdapatnya keperluan untuk pekerja menunaikan solat dalam waktu-waktu tertentu. Dalam masa yang sama, ia juga boleh dijadikan sebagai rujukan supaya pekerja tidak menyalahgunakan kepercayaan dan pelepasan yang diberikan oleh majikan. Majikan juga digesa untuk memberikan kelonggaran dan menyusun atur waktu bekerja bagi membolehkan pekerja beragama Islam untuk menunaikan solat Jumaat dan selesai solat boleh balik bekerja.
3. Undang-undang perburuhan tidak mengariskan secara spesifik hal-hal berkaitan keagamaan. Walaupun begitu, aduan boleh dikemukakan secara bertulis atau hadir ke Pejabat-Pejabat Tenaga Kerja (PTK) berhampiran sekiranya terdapat larangan menunaikan solat ditempat kerja untuk siasatan dan tindakan lanjut oleh pihak jabatan.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 25 NOVEMBER 2019 (ISNIN)

SOALAN

Minta **PERDANA MENTERI** jelaskan berapa kawasan Parlimen yang akan mempunyai jumlah pemilih melebihi 100 ribu orang selepas Undi 18 dan pendaftaran automatik dilaksanakan. Apakah rancangan untuk memastikan bahawa tiada kawasan Parlimen yang mempunyai terlalu ramai pemilih berdasarkan perkembangan ini.

JAWAPAN: YB TUAN MOHAMED HANIPA BIN MAIDIN
TIMBALAN MENTERI, DI JABATAN PERDANA MENTERI

Tuan Yang di-Pertua,

1. Untuk makluman Yang Berhormat, berdasarkan kepada Daftar Pemilih Tambahan Suku Tahun Kedua Tahun 2019, sebanyak **29 Bahagian Pilihan Raya Parlimen** sedia ada mempunyai jumlah pemilih melebihi 100,000 orang. Jumlah pemilih akan meningkat selepas Undi 18 dan pendaftaran pemilih secara automatik dilaksanakan. Walau bagaimanapun, maklumat bagi lain-lain Bahagian Pilihan Raya Parlimen hanya akan diketahui selepas pendaftaran ke atas pemilih yang berkaitan dilaksanakan.

2. Bagi tujuan memastikan sesebuah Bahagian Pilihan Raya Parlimen tidak mempunyai bilangan pemilih yang terlalu ramai, ia **hanya boleh dilaksanakan semasa urusan kajian semula persempadanan bahagian-bahagian pilihan raya dijalankan**. Dalam hal ini, urusan kajian semula persempadanan terhadap bahagian-bahagian pilihan raya sedia ada hanya boleh dilaksanakan selepas tamat lat tempoh 8 tahun atau terdapat pindaan undang-undang ke atas komposisi bilangan keanggotaan Ahli Dewan Rakyat atau Dewan Undangan Negeri. Bagi maksud tersebut, lat tempoh 8 tahun bagi kajian semula persempadanan **Negeri Sarawak akan berakhir pada tahun 2023, Negeri Sabah pada tahun 2025** manakala **Negeri-Negeri Tanah Melayu pula pada tahun 2026**.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB DATUK SERI DR. ADHAM BIN BABA
[TENGGARA]

TARIKH : 25 NOVEMBER 2019

SOALAN

Minta **MENTERI SUMBER MANUSIA** menyatakan apakah '*current job supply*' serta bidangnya pada masa sekarang dan bagaimanakah Kerajaan mengatasi isu tersebut serta siapakah kumpulan sasarannya

JAWAPAN

Tuan Yang di-Pertua,

1. *Current job supply* atau penawaran pekerjaan semasa adalah merujuk kepada penawaran pekerjaan dalam sektor-sektor yang ditetapkan seperti perkhidmatan, pembinaan, perlombongan dan kuari, pertanian, perladangan dan perkilangan/pembuatan.
2. Berdasarkan statistik Jabatan Perangkaan Malaysia sehingga suku kedua tahun 2019 yang dikeluarkan Jabatan Perangkaan Malaysia menunjukkan bahawa jumlah tenaga buruh mewakili penawaran dalam tempoh berkenaan adalah 15.6 juta orang.
3. Jumlah penduduk bekerja (mewakili permintaan) bagi suku kedua tahun 2019 pula adalah seramai 15.08 juta orang . Jumlah

SOALAN NO : 16

penganggur pada suku ke dua tahun 2019 pula adalah dianggarkan seramai 520.6 ribu orang atau 3.3%.

4. Tawaran jawatan mengikut bidang / sektor bagi suku kedua tahun 2019 adalah seperti berikut: _

- i. Bagi Sektor Pertanian - 505,000 peluang pekerjaan ditawarkan di mana pengisian bagi sektor ini adalah sebanyak 475,000;
- ii. Bagi Sektor Perlombongan dan Pengkuarian – 84,000 peluang pekerjaan disediakan di mana pengisian adalah sebanyak 84,000
- iii. Sektor pembuatan menawarkan kira-kira 2,270,000 kekosongan di mana pengisian sektor tersebut adalah sebanyak 2,148,000;
- iv. Sektor pembinaan pula menawarkan kekosongan sebanyak 1,310,000 di mana pengisian bagi sektor pembinaan adalah 1,288,000;
- v. Sektor perkhidmatan yang merupakan sektor terbesar menawarkan kekosongan jawatan sebanyak 4,451,000 bagi tempoh dimaksudkan manakala pengisian adalah sebanyak 4,407,000.

5. Kementerian Sumber Manusia melalui Institut Maklumat dan Analisa Pasaran Buruh (ILMIA) dan Talent Corp telah menerbitkan “*Critical Occupation List*” iaitu dokumen yang menyenaraikan 59 jenis profesion berkemahiran tinggi yang memerlukan pengisian segera/kritikal tetapi tidak mampu diimbangi oleh tawaran pasaran tenaga buruh tempatan semasa. Akibatnya negara masih bergantung kepada tenaga kerja berkemahiran tinggi dari luar negara untuk

SOALAN NO : 16

menerajui dan mengisi kekosongan jawatan berkemahiran tinggi tersebut.

6. Senarai perjawatan kritikal tersebut dapat dijadikan panduan kepada pencari kerja tempatan untuk melengkapi diri dengan pengetahuan serta kemahiran yang bersesuaian dengan perjawatan kritikal yang ditawarkan. Ia juga boleh dijadikan asas kepada institusi pengajian tinggi awam dan swasta serta para pembuat dasar untuk menyediakan program dan kursus yang relevan yang menjurus kepada keperluan jawatan kritikal berkenaan.

7. Ia turut menyenaraikan beberapa industri yang memerlukan pengisian segera pekerja berkemahiran tinggi seperti Elektrik dan Elektronik, Perkhidmatan Perniagaan Global (ICT & GBS), Telekomunikasi dan Multimedia serta Aeroangkasa.

8. Statistik Forum Ekonomi Dunia : Rumusan Modal Insan ASEAN (*Human Capital Outlook ASEAN*) mendapati jumlah keseluruhan pekerja tempatan berkemahiran tinggi hanya 25% berbanding pekerja tempatan berkemahiran sederhana sebanyak 62%.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 25 NOVEMBER 2019 (ISNIN)

SOALAN NO. 17

Minta **PERDANA MENTERI** menyatakan keberkesanan program pembasmian kemiskinan di bawah pengelolaan Unit Penyelarasan Pelaksanaan (ICU) dan apakah KPI yang digunakan.

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JABATAN PERDANA MENTERI

Yang di-Pertua,

Kerajaan telah membangunkan Sistem eKasih bertujuan untuk mendaftarkan golongan miskin di Malaysia dan mengklasifikasikan golongan miskin sama ada Miskin Tegar atau Miskin berdasarkan Pendapatan Garis Kemiskinan (PGK) semasa melalui proses verifikasi di lapangan. Kriteria penetapan kategori kemiskinan adalah bergantung kepada jumlah pendapatan perkapita isi rumah dan berasaskan kepada formula perkiraan yang telah disediakan oleh pihak Kementerian Hal Ehwal Ekonomi dan juga Jabatan Perangkaan Malaysia melalui Penyiasatan Pendapatan Isi Rumah 2016 ataupun *Household Income Survey* 2016. Terdapat tiga kategori status kemiskinan dalam sistem eKasih iaitu Miskin Tegar, Miskin dan Terkeluar.

eKasih bukanlah merupakan program atau bantuan, tetapi ia merupakan satu pangkalan data kemiskinan nasional yang

dikendalikan oleh Unit Penyelarasan Pelaksanaan, Jabatan Perdana Menteri (ICU JPM). Data eKasih digunakan oleh kementerian/agensi untuk menyalurkan bantuan melalui program pembasmian kemiskinan masing-masing. Antara kementerian/agensi pemberi bantuan termasuklah Kementerian Pendidikan Malaysia, Kementerian Pembangunan Wanita, Keluarga dan Masyarakat, Kementerian Pertanian dan Industri Asas Tani, Kementerian Pembangunan Luar Bandar, Kementerian Perumahan dan Kerajaan Tempatan, Kementerian Sumber Manusia dan Kementerian Tenaga, Sains, Teknologi, Alam Sekitar dan Perubahan Iklim dan Kementerian Kewangan Malaysia.

Berdasarkan rekod eKasih, sehingga 30 September 2019 sebanyak 2,404,833 bilangan bantuan dengan jumlah sebanyak RM3.5 bilion telah disalurkan kepada isi rumah eKasih berstatus Miskin Tegar dan Miskin di seluruh negara untuk program dan bantuan kesejahteraan rakyat.

Sistem eKasih bersifat dinamik. Selain maklumat profil/kemiskinan, Sistem eKasih juga mengandungi maklumat bantuan dan nilai bantuan yang diterima oleh isi rumah eKasih. Maklumat-maklumat bantuan ini dikemas kini oleh kementerian/agensi pemberi bantuan masing-masing. Setiap bantuan yang disalurkan oleh kerajaan negeri perlu direkodkan dalam sistem eKasih bagi membolehkan maklumat bantuan yang disalurkan serta keberkesanan program pembasmian kemiskinan dapat dipantau. Pemantauan dan penyelarasan penyaluran bantuan yang diterima dari kerajaan negeri juga dapat mengelakkan sebarang pertindihan atau ketirisan kepada rakyat seterusnya membolehkan pihak Kerajaan menyalurkan bantuan yang sewajarnya dengan lebih berkesan dan efisien.

Pelbagai program/bantuan telah dan sedang dilaksanakan oleh kementerian-kementerian dan agensi-agensi Kerajaan Pusat dan Negeri bagi memastikan kadar kemiskinan terus dikurangkan. Berdasarkan rekod eKasih sehingga 30 September 2019, sebanyak 7,763,018 bilangan bantuan kesejahteraan rakyat dengan jumlah sebanyak RM10.5 bilion telah disalurkan kepada isi rumah eKasih di seluruh negara. Bantuan yang telah disalurkan ini secara tidak langsung telah membantu isi rumah

eKasih terkeluar daripada garis kemiskinan di mana ketika ini sebanyak 469,491 isi rumah yang berdaftar dalam sistem eKasih berada dalam kategori Terkeluar, dan lebih 80% daripada mereka terkeluar disebabkan oleh peningkatan pendapatan. Statistik eKasih bagi tempoh lima tahun iaitu dari 2015 hingga 2019 (30 September 2019) menunjukkan trend peningkatan bilangan isi rumah eKasih di bawah kategori Terkeluar yang mana ini menggambarkan bahawa bantuan Kerajaan telah berjaya membantu isi rumah eKasih meningkatkan pendapatan. Statistik isi rumah miskin kategori Terkeluar adalah seperti jadual di bawah:

Tahun	Bilangan KIR di bawah kategori Terkeluar
2015	295,419
2016	346,458
2017	402,560
2018	439,228
2019 (30 September 2019)	469,491

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH NANCY SHUKRI
[BATANG SADONG]**

TARIKH : 25 NOVEMBER 2019 (ISNIN)

SOALAN NO. 18

Minta **MENTERI HAL EHWAL EKONOMI** menyatakan sama ada konsep baru kemakmuran bersama akan menghasilkan perkongsian pendapatan yang lebih adil dan lebih saksama daripada sumber minyak dan gas yang dihasilkan di Sarawak antara Kerajaan Persekutuan, Petronas dan Kerajaan Sarawak yang kini hanya menerima 5% daripadanya.

JAWAPAN

Tuan Yang di-Pertua,

1. Sebagaimana Ahli Yang Berhormat sedia maklum, Wawasan Kemakmuran Bersama 2030 (WKB) adalah hala tuju baharu negara yang telah diumumkan oleh YAB Perdana Menteri semasa membentangkan Kajian Separuh Penggal Rancangan Malaysia Kesebelas (KSP RMKe-11) pada 18 Oktober 2018 di Parlimen. Kerangka asas WKB dijelaskan oleh YAB Perdana Menteri dalam Perutusan Perdana Setahun Malaysia Baharu Kerajaan Pakatan Harapan pada 9 Mei 2019 dan wawasan ini dilancarkan dengan rasminya pada 5 Oktober 2019 lalu.

2. Secara umumnya, WKB adalah iltizam untuk menjadikan Malaysia sebagai sebuah negara yang terus membangun secara mampan seiring dengan pengagihan ekonomi yang adil, saksama dan inklusif pada semua peringkat kumpulan pendapatan, etnik, wilayah dan rantai bekalan. Matlamat WKB adalah untuk menyediakan taraf hidup yang wajar (*decent standard of living*) kepada semua rakyat Malaysia pada tahun 2030.

3. Di bawah hala tuju baharu ini, Kerajaan komited untuk memastikan pengagihan ekonomi yang lebih adil dan saksama serta inklusif termasuk isu berkaitan perkongsian pendapatan daripada sumber minyak dan gas yang dihasilkan di Sarawak.

4. Isu berkaitan minyak dan gas adalah kompleks dan melibatkan banyak pihak berkepentingan. Mesyuarat Jawatankuasa Khas Kabinet (Pemandu) bagi Menyemak Pelaksanaan Perjanjian Malaysia 1963 (MA63) yang dipengerusikan oleh YAB Perdana Menteri pada 17 Disember 2018 memutuskan supaya ianya dibincangkan dalam satu forum berasingan. Dalam hal ini, dua Forum Berasingan (*Separate Forum*) telah dibentuk yang dipengerusikan secara bersama oleh YB Menteri Hal Ehwal Ekonomi dan YAB Ketua Menteri Sarawak (bagi isu berkaitan Sarawak) dan YAB Ketua Menteri Sabah (bagi isu berkaitan Sabah).

5. Skop forum berasingan ini merangkumi tiga (3) perkara iaitu:-

- (i) Bayaran tunai atau Royalti;
- (ii) Perbincangan komersial / *Business-to-Business* (B2B); dan
- (iii) Cukai Jualan Produk Petroleum.

6. Mesyuarat Forum Berasingan dengan Kerajaan Negeri Sabah telah diadakan di Parlimen pada 16 Julai 2019. Forum ini dipengerusikan secara bersama oleh YB Menteri Hal Ehwal Ekonomi dan YAB Ketua Menteri Sabah.

7. Selain itu, dalam Mesyuarat Jawatankuasa Khas Kabinet (Pemandu) bagi Menyemak Pelaksanaan Perjanjian Malaysia 1963 (MA63) yang dipengerusikan oleh YAB Perdana Menteri pada 23 Julai 2019, telah bersetuju bahawa isu berkaitan petroleum akan dibincang dan diputuskan secara bersama antara YAB Perdana Menteri dan kedua-dua Ketua Menteri, Sabah dan Sarawak.

8. Keputusan daripada perbincangan antara ketiga-tiga pemimpin ini akan menjadi asas untuk meneruskan perbincangan selanjutnya termasuk mengenai permintaan 20% royalti untuk Sabah dan Sarawak.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS
MAJLIS MESYUARAT DEWAN RAKYAT

PERTANYAAN : LISAN

DARIPADA : PUAN NOORITA BINTI SUAL

TARIKH : 25 NOV 2019 (ISNIN)

SOALAN

PUAN NOORITA BINTI SUAL [TENOM] minta **MENTERI INDUSTRI UTAMA** menyatakan **langkah** Kementerian untuk **meningkatkan nilai eksport coklat** negara sejajar kedudukan Malaysia sebagai negara memproses biji koko kedua terbesar di Asia dan ketujuh di dunia dengan menguasai 22 peratus pasaran produk berasaskan koko bagi rantau Asia dan negara Oceania.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Industri Utama akan terus menjalankan promosi pasaran eksport untuk mengukuh serta meningkatkan syer pasaran produk-produk koko Malaysia yang meliputi produk separa siap, produk coklat dan konfeksi koko di pasaran tradisional di wilayah Eropah Barat dan Amerika Selatan serta pasaran sedia ada di wilayah Asia Timur Tengah dan negara-negara ASEAN. Ini adalah sejajar dengan kedudukan Malaysia sebagai negara pemprosesan biji koko kedua terbesar di Asia dan ketujuh di dunia dengan menguasai 22 peratus pasaran produk berasaskan koko bagi rantau Asia dan negara Oceania,

Kementerian juga giat menjalankan promosi pasaran antarabangsa untuk meneroka peluang-peluang pasaran baru di wilayah Eropah Timur dan Afrika. Kementerian akan terus melaksanakan beberapa pendekatan untuk meningkatkan nilai eksport coklat negara melalui program-program berikut:

- (i) penganjuran misi ekonomi dan teknikal serta lawatan kerja koko ke wilayah-wilayah yang berpotensi seperti wilayah Afrika, Eropah Timur serta Asia dan Oceania;
- (ii) mempergiat penyertaan dalam eksposisi perdagangan antarabangsa seperti GulFood Dubai, YUMMEX Middle East, Africa's Big 7 Afrika Selatan, International Sweets and Biscuit Fair Cologne, Germany, World Food Moscow dan World Food Istanbul;
- (iii) memperkukuh risikan pasaran (*market intelligence*) iaitu menjalankan kajian pasaran produk-produk koko bagi tujuan pengumpulan data dan maklumat pasaran di wilayah-wilayah sasaran utama bagi menyusun pelan dan strategi pemasaran yang berkesan; dan
- (iv) melengkapkan serta mengemaskini pangkalan data Sistem Ekonomi Pintar (SEP) yang berfungsi untuk menyediakan sistem pengumpulan data yang sistematik bagi tujuan analisis, menerbitkan data-data perangkaan koko serta menyebarkan maklumat yang tepat dan terkini kepada pengguna.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI HAJI ABDUL HADI BIN AWANG
[MARANG]**

TARIKH : 25 NOVEMBER 2019 (ISNIN)

SOALAN NO. 20

Minta **MENTERI HAL EHWAL EKONOMI** menyatakan sejauh mana prestasi dan pencapaian agenda memartabatkan maruah bangsa Melayu dan Islam serta kedudukan ekonomi Melayu sepanjang setahun di bawah pentadbiran Kerajaan baharu.

JAWAPAN

Tuan Yang di-Pertua,

1. Kerajaan sentiasa komited dalam melaksanakan inisiatif bagi meningkatkan ekonomi golongan Bumiputera dan semua rakyat Malaysia pelbagai kaum dan agama bagi memastikan pembangunan sosioekonomi yang lebih seimbang dan adil. Namun begitu, Kerajaan juga berpandangan agenda pemeraksanaan ekonomi orang Melayu dan golongan Bumiputera perlu ditambah baik dan diperkukuhkan terutama kepentingan Bumiputera sepertimana komitmen dari janji Kerajaan dalam Manifesto Kerajaan Pakatan Harapan kerana pencapaian sosioekonomi Bumiputera masih lagi rendah.

2. Untuk makluman Ahli Yang Berhormat, berdasarkan Penyiasatan Pendapatan Isi Rumah dan Kemudahan Asas (PPIR&KA) Tahun 2016 oleh Jabatan Perangkaan Malaysia, pecahan kumpulan isi rumah B40

mengikut etnik adalah 71.3% adalah Bumiputera, 18.7% Cina, 8.1% India dan 2% lain-lain etnik.

3. Sehubungan itu, agenda bagi memperkasakan orang Melayu dan Bumiputera akan terus diberi penekanan oleh Kerajaan khususnya bagi merapatkan jurang sosioekonomi di antara kaum serta dalam kalangan kaum itu sendiri termasuk di kalangan Melayu dan Bumiputera. Manakala, penyertaan orang Melayu dan Bumiputera secara saksama akan diberi keutamaan bagi menangani penyertaan yang tidak seimbang dalam guna tenaga; pemilikan aset seperti hartanah dan ekuiti korporat; dan penyertaan orang Melayu dan Bumiputera dalam aktiviti nilai ditambah tinggi.

4. Kerajaan sentiasa meneliti semula dasar-dasar utama negara supaya pembangunan sosioekonomi Bumiputera akan tetap menjadi agenda nasional tanpa meminggirkan kaum-kaum lain di negara ini. Dalam hal ini, tindakan afirmatif akan diteruskan khususnya untuk membangunkan potensi Bumiputera bagi meningkatkan penyertaan mereka dalam ekonomi negara dan seterusnya mencapai matlamat pengagihan kekayaan yang lebih saksama.

5. Walau bagaimanapun, sehingga kini pencapaian Bumiputera berbanding bukan Bumiputera masih lagi rendah seperti ditunjukkan oleh indikator sosioekonomi berikut;

(i) pemilikan ekuiti Bumiputera dalam sektor korporat adalah 16.2 peratus pada tahun 2015;

(ii) pendapatan purata isi rumah Bumiputera pada tahun 2016 adalah rendah iaitu RM6,267 berbanding bukan Bumiputera sebanyak RM8,213;

(iii) peratus kategori pekerjaan mahir antara kaum pada tahun 2018 adalah sebanyak 28.9 peratus bagi Bumiputera berbanding 35 peratus bagi bukan Bumiputera; dan

(iv) peratus transaksi pemilikan kediaman Bumiputera dalam pasaran primer pada tahun 2018 adalah 46.5 peratus (nilai bersamaan RM6.2 bilion) berbanding bukan Bumiputera sebanyak 49.1 peratus (nilai bersamaan RM6.56 bilion) manakala dalam jenis pemilikan komersil, peratus transaksi Bumiputera hanyalah 8.2 peratus (nilai bersamaan RM0.16 bilion) berbanding bukan Bumiputera iaitu 42.6 peratus (nilai bersamaan RM0.85 bilion).

6. Bagi meneruskan dasar, strategi dan inisiatif untuk mengangkat martabat seluruh rakyat Malaysia khususnya Melayu dan Islam, Kerajaan telah merangka satu wawasan baharu iaitu Wawasan Kemakmuran Bersama 2030 (WKB) yang telah dilancarkan pada 5 Oktober 2019 oleh YAB Perdana Menteri. WKB merupakan hala tuju baharu pembangunan negara bagi tempoh 10 tahun iaitu mulai tahun 2021 hingga 2030 dengan matlamat untuk memastikan seluruh rakyat Malaysia dapat mengecapi taraf hidup wajar atau "*decent standard of living*" pada tahun 2030.

7. Walaupun WKB akan dilaksanakan mulai tahun 2021 namun Kerajaan telah memberi penekanan dengan menyediakan peruntukan sebanyak RM8 billion dalam Belanjawan 2020 berbanding tahun 2019 sebanyak RM7.6 bilion.

8. Selain itu, Kerajaan akan terus menegakkan kedudukan agama Islam sebagai agama Persekutuan sebagaimana yang diperuntukkan dalam Perlembagaan Persekutuan. Oleh itu, dalam Belanjawan 2020, peruntukan bagi hal ehwal Islam di bawah Jabatan Perdana Menteri ditingkatkan kepada RM1.3 bilion berbanding RM1.2 bilion pada tahun 2019. Antara langkah spesifik Kerajaan dalam Belanjawan 2020 adalah seperti menaikkan elaun Guru Kelas Al-Quran.

9. Kerajaan percaya dan yakin bahawa langkah dan inisiatif yang diambil ini akan dapat mengurangkan jurang kesaksamaan ekonomi rakyat Malaysia khususnya orang Melayu dan Bumiputera sekaligus berupaya memartabatkan maruah bangsa Melayu dan Islam serta kedudukan ekonomi Melayu. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[PENDANG]**

TARIKH : 25 NOVEMBER 2019 (ISNIN)

SOALAN NO. 21

Minta **MENTERI HAL EHWAL EKONOMI** menyatakan bagaimana konsep 'Kemakmuran Bersama' khusus dalam penstrukturan semula ekonomi negara akan dapat membantu mewujudkan peluang pekerjaan baharu, mengatasi masalah kemiskinan serta merapatkan jurang pendapatan terutama di kalangan anak muda dan golongan yang tinggal di kawasan luar bandar.

JAWAPAN

Tuan Yang di-Pertua,

1. Wawasan Kemakmuran Bersama 2030 (WKB) merupakan hala tuju baharu pembangunan negara bagi tempoh 10 tahun mulai tahun 2021 hingga 2030.
2. Untuk makluman Ahli Yang Berhormat, secara keseluruhannya, walaupun pertumbuhan ekonomi negara menunjukkan prestasi yang menggalakkan, namun ianya masih belum digembleng sepenuhnya bagi mencapai potensi yang optimum. Selain itu, terdapat pelbagai isu struktur yang perlu ditangani, antaranya sumber pertumbuhan yang masih bergantung kepada faktor pengeluaran tradisional seperti modal serta buruh dan bukannya peningkatan produktiviti.

3. Pelaburan berkualiti tinggi akan diberi keutamaan bagi mewujudkan lebih banyak pekerjaan berkemahiran tinggi. Pekerjaan berkemahiran tinggi akan memastikan pekerja mendapat upah yang tinggi. Dalam hal ini, Kerajaan akan mengkaji semula Akta Penggalakan Pelaburan 1986 bagi menarik lebih banyak pelaburan berkualiti tinggi. Kerajaan juga selektif dalam menarik pelaburan dengan keutamaan kepada aktiviti berintensifkan pengetahuan dan inovasi seperti mempersiapkan modal insan negara untuk berhadapan dengan Revolusi Industri 4.0.

4. Di samping itu, bagi merapatkan jurang pendapatan rakyat, beberapa inisiatif di bawah telah diambil seperti berikut:

- i. Mengkaji Semula Dasar Gaji Minimum
- ii. Membangunkan Indeks Gaji Kebangsaan
- iii. Memperluas Sistem Upah yang Dikaitkan dengan Produktiviti (PLWS)

5. Isu produktiviti berkait rapat dengan tahap kemahiran pekerja. Pada masa ini, industri masih didominasi oleh pekerjaan separuh mahir dan berkemahiran rendah yang merangkumi sebanyak 72.8 peratus daripada keseluruhan tenaga kerja. Bagi menangani masalah ini, Kerajaan akan membuat pengalakkan dalam TVET.

6. Berdasarkan Laporan Tahunan Bank Negara Malaysia 2017, gaji pekerja Malaysia adalah lebih rendah dan tidak setimpal berbanding dengan produktiviti buruh. Bahagian pampasan pekerja kepada KDNK Malaysia masih rendah iaitu 35.7% pada tahun 2018 berbanding negara maju seperti Jerman sebanyak 51.5%, United Kingdom 49.4% dan Korea Selatan 45.7%.

7. Oleh yang demikian, objektif pertama WKB adalah untuk menstruktur semula ekonomi ke arah yang lebih progresif, berpaksikan

ilmu dan bernilai tinggi. Penekanan akan diberikan kepada peningkatan produktiviti sebagai salah satu pemacu pertumbuhan ekonomi.

8. Selain daripada isu struktur, masih wujud jurang ekonomi yang ketara di setiap peringkat kumpulan pendapatan, wilayah, etnik, dan rangkaian bekalan. Objektif kedua WKB akan menumpukan kepada usaha untuk merapatkan jurang tersebut. Jurang pendapatan yang ketara di antara kelas pendapatan berlaku berikutan pendapatan kumpulan isi rumah B40 lebih bergantung kepada penggajian dan kumpulan ini juga kurang memiliki aset yang boleh menjana pendapatan lain. Kerajaan yakin tumpuan kepada aktiviti ekonomi bernilai tinggi dan pewujudan pekerjaan berpendapatan tinggi akan menyumbang kepada usaha untuk merapatkan jurang ekonomi antara kumpulan pendapatan.

9. Di samping itu, Teras Strategik 5 WKB, Kesejahteraan Sosial, memberi penekanan kepada kebajikan semua kelompok masyarakat terutamanya golongan rentan ekonomi dan kumpulan isi rumah B40.

10. Kerajaan sedar bahawa jurang pengagihan ekonomi antara kawasan bandar dan luar bandar semakin melebar. Dalam Teras Strategik Kedua, terdapat 15 cadangan Aktiviti Pertumbuhan Ekonomi Utama (KEGA). Antaranya ialah tumpuan kepada Pertanian Pintar dan penekanan kepada Komoditi Malaysia 2.0.

11. Selain itu, penekanan kepada Komoditi Malaysia 2.0 membolehkan tumpuan diberikan kepada penghasilan produk hiliran daripada komoditi, seperti sawit dan getah, supaya dapat menjana nilai ditambah dan pulangan yang lebih tinggi. Dalam Teras Strategik keenam WKB pula, iaitu Keterangan Wilayah, pemetaan titik tumpuan ekonomi atau *economic hot spots*, akan dilaksanakan.

12. Kerajaan yakin semua inisiatif di dalam WKB ini akan menyediakan peluang kepada anak muda dan golongan luar bandar berdasarkan prinsip *equitability of outcomes*. Ini bermakna semua bentuk bantuan dan peluang akan disediakan oleh kerajaan untuk direbut oleh golongan ini selaras dengan matlamat dasar yang baik, memerlukan sambutan oleh rakyat. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. AHMAD ZAHID BIN
HAMIDI [BAGAN DATUK]**

TARIKH : 25 NOVEMBER 2019 (ISNIN)

SOALAN NO. 22

Minta **PERDANA MENTERI** menyatakan adakah terdapat sebarang perancangan untuk menetapkan kadar tertentu bagi pencen penjawat awam pada masa akan datang.

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, merujuk kepada Peraturan-peraturan Pencen 1980, pengiraan pencen kepada penjawat awam adalah berasaskan kepada tempoh perkhidmatan yang boleh diambilkira tertakluk maksimum $\frac{3}{5}$ daripada gaji akhir.

Bagi situasi dimana pegawai dibersarakan atas sebab kesihatan, kematian dalam perkhidmatan atau penswastaan, pencen minimum yang boleh diberikan kepada pegawai adalah $\frac{1}{5}$ daripada gaji akhir. Manakala, bagi pegawai yang telah berkhidmat sekurang-kurangnya 25 tahun tempoh perkhidmatan yang boleh diambilkira, pegawai akan menerima pencen terendah sebanyak RM1,000.00 sekiranya pengiraan pencen adalah kurang daripada jumlah tersebut.

Pada masa sekarang, Kerajaan belum bercadang untuk menetapkan kadar tertentu pencen selain daripada keadaan yang dinyatakan di atas.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : YB FONG KUI LUN [BUKIT BINTANG]

TARIKH : 25 NOVEMBER 2019 (ISNIN)

SOALAN

Minta **MENTERI HAL EHWAL EKONOMI** menyatakan syarikat-syarikat berkaitan Kerajaan yang telah disusun semula berikutan kurang berprestasi dan senarai nama ketua GLC yang baru dan bagaimana mereka boleh berperanan untuk meningkatkan prestasi yang ada.

JAWAPAN

Tuan Yang di-Pertua,

1. Untuk menjawab soalan Ahli Yang Berhormat, Kementerian Hal Ehwal Ekonomi (MEA) akan menumpukan kepada institusi yang berada di bawah bidang tanggung jawab kementerian ini iaitu Khazanah Nasional Berhad.
2. Khazanah merupakan syarikat pelaburan strategik negara di mana penjualan atau lebih tepat, “pelupusan” aset adalah aktiviti perniagaan yang lazim dilakukan oleh Khazanah sebagai sebuah dana pelaburan. Khazanah mengklasifikasikan aset dan pelaburannya kepada dua kategori iaitu aset strategik dan aset komersial. Bagi aset komersial, Khazanah tidak mencampuri urusan pengurusan syarikat, namun, memegang sejumlah saham bagi tujuan pelaburan dan pelupusan sahaja.

3. Bagi aset-aset strategik Khazanah seperti Tenaga Nasional Berhad (TNB), Telekom Malaysia (TM), Malaysia Airport Holdings Berhad (MAHB) dan Malaysia Airlines Group Berhad (MAS), Khazanah sentiasa meletakkan sasaran yang tinggi bagi memastikan ia memenuhi tuntutan serta objektif strategik dan kewangan organisasi.
4. Sehubungan itu, pelaksanaan pelan strategik baharu di beberapa buah GLC-GLC seperti ini adalah turut menjadi dasar kepada pelantikan Ketua Pegawai Eksekutif (CEO) serta anggota Pengurusan Tertingginya. Pelantikan mereka adalah berdasarkan pencapaian serta sumbangan dalam mencapai sasaran syarikat.
5. Sebagai contoh, berikut adalah GLC-GLC tersenarai terbesar di bawah Khazanah yang diterajui oleh CEO baharu serta pelan strategik / tindakan yang dirancang oleh syarikat-syarikat berkenaan:

GLC	Ketua Pegawai Eksekutif (CEO)	Pelan Strategik / Peranan
Tenaga Nasional Berhad	Encik Amir Hamzah Azizan (dilantik pada 2 April 2019)	Pelaksanakan inisiatif penyusunan semula dalaman untuk memastikan kelangsungan perniagaannya pada masa hadapan dan menyelaraskan syarikat dengan pembaharuan 2.0 Malaysian Electricity Supply Industry ("MESI").
Telekom Malaysia	Dato' Noor Kamarul Anuar bin Nuruddin (dilantik pada 13 Jun 2019)	Meningkatkan prestasi TM melalui pelaksanaan Rancangan Peningkatan Prestasi (PIP) 2019-2021 yang merupakan lanjutan daripada rancangan PIP 2018 yang terdiri daripada 4 bidang utama, iaitu: <ol style="list-style-type: none">1. Pemeliharaan dan Peningkatan Pendapatan;2. Keuntungan yang Berkekalan;3. Aliran Tunai Meningkat; dan

		<p>4. Peningkatan Produktiviti.</p> <p>Dengan 4 bidang utama ini sebagai panduan, TM menyasarkan untuk memastikan daya tahan dan kemampanan jangka panjang ke arah membentuk "TM Baharu".</p>
Malaysia Airports Holdings Berhad	YM Raja Azmi Raja Nazuddin (dilantik pada 1 Feb 2019)	Persedia untuk beralih kepada keadaan operasi di bawah rangka kerja <i>Regulated Asset Base</i> ("RAB").
Malaysia Airlines Group Berhad	Kapten Izham Ismail (dilantik pada 1 Disember 2017)	Menilai semua pilihan strategik bersama-sama Khazanah untuk memacu syarikat ke arah kemampanan kewangan pada masa hadapan.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT, MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN RAMLI BIN DATO' MOHD NOR
[CAMERON HIGHLANDS]**

TARIKH : 25 NOVEMBER 2019 (ISNIN)

SOALAN

Minta **PERDANA MENTERI** menyatakan apakah perancangan dan tindakan pihak Kerajaan dan JAKOA bagi menyelesaikan isu infrastruktur asas seperti jalan, elektrik, sumber air bersih dan perumahan bagi masyarakat Orang Asli khususnya di kawasan Parlimen Cameron Highlands dan amnya di seluruh negara bagi penyelesaian tempoh jangka masa panjang.

**JAWAPAN : YB SENATOR TUAN WAYTHA MOORTHY A/L
PONNUSAMY, MENTERI DI JABATAN PERDANA MENTERI**

Tuan Yang di-Pertua,

Jabatan Perdana Menteri (JPM) melalui Jabatan Kemajuan Orang Asli (JAKOA) telah melaksanakan pelbagai projek di perkampungan Orang Asli bagi menyelesaikan isu infrastruktur asas seperti jalan, elektrik, sumber air bersih dan perumahan bagi masyarakat Orang Asli khususnya di kawasan Parlimen Cameron Highlands.

Terdapat 87 buah kampung Orang Asli yang diiktiraf di Parlimen Cameron Highlands dengan penduduk berjumlah 19,919 orang. Daripada jumlah tersebut sebanyak 70 kampung (80%) telah mempunyai bekalan air terawat, 43 kampung (49%) telah mempunyai bekalan elektrik, 72 kampung (82%) telah mempunyai jalan perhubungan. Manakala sepanjang tahun 2009 hingga 2019, sebanyak 415 rumah baru telah dibina dan 169 buah rumah telah dibaikpulih di perkampungan Orang Asli parlimen Cameron Highlands.

JAKOA sentiasa membuat perancangan terhadap isu pembangunan yang melibatkan masyarakat Orang Asli bagi memastikan Orang Asli tidak tercicir dari arus perdana. Walaubagaimanapun pelaksanaannya bergantung kepada peruntukan dan faktor lokasi perkampungan yang terletak di kawasan ekstrem.

Bagi tahun 2020, JAKOA telah diperuntukkan sebanyak RM83.55 juta di bawah peruntukan pembangunan melibatkan pelaksanaan lapan (8) projek/program sambungan dan empat (4) projek baru meliputi pembangunan infrastruktur, pembangunan ekonomi dan usahawan, pembaikan TABIKA serta penyediaan kelengkapan di pusat-pusat transit untuk memastikan kebajikan Orang Asli sentiasa dijaga dan diberi perhatian sewajarnya oleh Kerajaan. Peruntukan yang diterima adalah lebih tinggi berbanding sebanyak RM56.54 juta sahaja pada tahun 2019. Ini menunjukkan komitmen Kerajaan dalam memastikan pembangunan untuk masyarakat Orang Asli sentiasa dipertingkatkan supaya selari dengan arus perdana.

Strategi pembangunan secara menyeluruh sentiasa akan diteliti dan dipertimbangkan oleh JAKOA bagi memastikan masyarakat Orang Asli dibangunkan secara holistik. Dalam RMK-12 yang akan datang, pembangunan infrastruktur akan diteliti dan diperluaskan dari aspek-aspek seperti penyediaan bekalan elektrik melalui solar/ mini hidro, penyelenggaraan elektrik, telekomunikasi dan bekalan air mentah melalui kerjasama strategik dengan agensi-agensi kerajaan, badan berkanun, syarikat swasta dan Badan Bukan Kerajaan (NGO) supaya projek dapat dilaksanakan melalui kaedah inovasi dengan kos yang minimum namun memberikan manfaat kepada Orang Asli secara khususnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATO' MANSOR OTHMAN (NIBONG TEBAL)

TARIKH : 25 NOVEMBER 2019 (ISNIN)

SOALAN

minta **PERDANA MENTERI** menyatakan pendirian dan usaha-usaha Kerajaan bagi menangani ucapan-ucapan serta kenyataan- kenyataan kebencian kaum dan agama yang mengancam keharmonian dan perpaduan kaum oleh ahli-ahli politik, pemimpin-pemimpin masyarakat dan aktivis-aktivis pelbagai jenis.

JAWAPAN : YB SENATOR TUAN WAYTHA MOORTHY A/L PONNUSAMY, MENTERI DI JABATAN PERDANA MENTERI (PERPADUAN NEGARA DAN KESEJAHTERAAN SOSIAL)

Yang di-Pertua,

Sejak mengecapi kemerdekaan dan sepanjang proses pembinaan negara, pucuk pimpinan negara amat peka terhadap cabaran-cabaran dalam memupuk persefahaman dan keharmonian di dalam sebuah negara majmuk yang kaya dengan kepelbagaian seperti Malaysia. Perpaduan nasional sememangnya menjadi agenda utama dalam memperkasakan keharmonian rakyat di Malaysia.

Kemajuan teknologi pada masa kini melalui media sosial telah memudahkan penyebaran maklumat dengan lebih meluas dan pantas merentasi sempadan. Kemudahan ini juga seringkali menjadi medium untuk segelintir individu dan kumpulan yang tidak bertanggungjawab

untuk menyebar luas akan bahan berbaur hasutan dan berita palsu yang seringkali boleh mencetuskan kebimbangan serta ketidakharmonian dalam kalangan masyarakat. Namun, Jabatan Perpaduan Negara dan Integrasi Nasional (PERPADUAN) tetap meneruskan usaha untuk memupuk perpaduan di segenap lapisan masyarakat mahupun dalam kalangan komuniti maya.

Kerajaan pada dasarnya telah mengambil langkah proaktif menubuhkan Jawatankuasa Mempromosikan Persefahaman dan Keharmonian Antara Penganut Agama (JKMPKA) pada 24 Februari 2010 melalui keputusan Mesyuarat Jemaah Menteri. Penubuhan JKMPKA ini dianggotai seramai 32 orang iaitu wakil pemimpin agama Islam, wakil pemimpin agama bukan Islam yang menganggotai *Malaysian Consultative Council for Buddhism, Christianity, Sikhism, Hinduism and Taoism* (MCCBCSHT), wakil pemimpin agama Baha'i, pakar akademik, belia dan wakil pemimpin agama dari Sabah dan Sarawak.

Fungsi JKMPKA ini antara lainya ialah membincangkan isu-isu konflik antara penganut agama di platform terbuka dalam ruang yang tertutup. Semua anggota JKMPKA lantikan YAB Perdana Menteri adalah mereka yang berupaya untuk berkongsi pandangan dan menerima pandangan secara optimis serta mempunyai ilmu pengetahuan yang luas berkaitan hal ehwal agama masing-masing.

Selain itu, JKMPKA juga bertanggungjawab untuk mendampingi masyarakat di peringkat akar umbi melalui sesi dialog, forum, ceramah dan sebagainya yang bersesuaian agar masyarakat Malaysia yang terdiri daripada pelbagai kaum, agama, adat resam dan budaya ini boleh menerima dan meraikan perbezaan serta hidup dalam suasana harmoni serta aman damai.

Peranan JKMPKA juga adalah untuk mengendalikan sesi mediasi sebagai salah satu kaedah intervensi jika berlaku suasana ketegangan antara penganut agama atau kaum agar usaha meredakan konflik secara harmoni ini mampu merapatkan semula hubungan antara pihak-pihak yang bertelagah. Usaha murni ini memerlukan kemahiran

interpersonal yang tinggi kerana peranan utama JKMPKA ini adalah untuk mempromosikan keharmonian antara kaum dan antara penganut agama di Malaysia.

Selain itu, keanggotaan JKMPKA yang terdiri daripada wakil-wakil kumpulan agama masing-masing juga merupakan kekuatan jawatankuasa ini kerana mereka mudah mengadakan rundingan dan menjalinkan hubungan rapat antara kumpulan penganut-penganut agama lain di Malaysia. Wakil-wakil kepimpinan agama dalam JKMPKA adalah berpengetahuan luas, disegani dan mampu memberi pandangan yang berimpak tinggi untuk memastikan para penganut agama memahami kepentingan semangat muhibah dalam kalangan rakyat Malaysia serta kepentingan memahami Perlembagaan Persekutuan Malaysia.

Secara umumnya, peranan JKMPKA untuk mempromosikan persefahaman dan keharmonian antara penganut agama serta tindakan penguatkuasaan undang-undang melalui instrumen perundangan khusus seperti Akta Hasutan 1948, Kanun Keseksaan dan Akta Suruhanjaya Komunikasi dan Multimedia Malaysia 1998 adalah mencukupi dalam usaha Kerajaan memantau serta mengambil tindakan proaktif dalam menangani ucapan dan kenyataan kebencian kaum dan agama. Ketiga-tiga Akta ini adalah masih relevan dan digunakan jika berlaku perlakuan yang berunsurkan provokasi dan penghinaan terhadap kaum, agama oleh individu atau pihak yang tidak bertanggungjawab.

Kerajaan di bawah kepimpinan YAB Tun Dr. Mahathir Mohamad, Perdana Menteri Malaysia, sentiasa peka dan sensitif terhadap isu-isu yang menyentuh kaum dan agama dan akan sentiasa memastikan keharmonian terus terpelihara melalui langkah-langkah berikut:

- (i) mengingatkan pemimpin parti politik supaya menjaga sensitiviti kaum dan agama dan tidak membuat teguran secara terbuka. Setiap kenyataan yang dikeluarkan tidak sepatutnya menyakitkan hati mana-mana kumpulan kaum dan penganut agama.

- (ii) menyampaikan mesej kepada pemimpin-pemimpin parti-parti politik supaya mengingatkan dan memberikan kesedaran kepada ahli-ahli parti agar sentiasa mengukuhkan perpaduan, terutama dalam persekitaran domestik dan luaran yang amat mencabar pada masa ini.
- (iii) menghormati antara satu sama lain apabila memberi sebarang pendapat dan pandangan dan tidak melampaui batasan dengan menggunakan bahasa yang kesat ketika menyentuh isu kaum dan agama. Walaupun wujud ideologi politik dan pandangan yang berbeza, masing-masing perlu kekal menghormati dan menghargai satu sama lain seperti kebiasaan dan meneutralkan politik kebencian.
- (iv) mendakwa di mahkamah mana-mana ahli politik yang sengaja menimbulkan sensitiviti kaum dan agama sehingga menimbulkan kebencian, kebimbangan dan kegusaran rakyat di bawah undang-undang yang sedang berkuat kuasa.

Kerajaan yakin dan percaya bahawa proses membina negara dan memupuk perpaduan nasional ke arah keharmonian negara sememangnya merupakan satu perjuangan berterusan yang memerlukan usaha-usaha dinamik bagi membuka minda dan sikap rakyat untuk meraikan dan menghargai kepelbagaian yang wujud. Usaha memupuk persefahaman dan perpaduan dalam kepelbagaian (*unity in diversity*) ini memerlukan penyertaan dan sumbangan dari semua pihak, terutamanya ahli-ahli politik, aktivis-aktivis masyarakat, pemimpin-pemimpin masyarakat, badan bukan kerajaan (NGO) dan sektor swasta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 25 NOVEMBER 2019

SOALAN NO. 26

Minta **PERDANA MENTERI** menyatakan sama ada Kerajaan bercadang untuk mengkaji semula dasar dan mekanisme pembiayaan biasiswa Jabatan Perkhidmatan Awam (JPA) yang diperkenalkan oleh pada tahun 2016 di mana model biasiswa telah ditukar kepada perjanjian pinjaman.

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, Pelaksanaan Pinjaman Boleh Ubah (PBU) sedia ada adalah berasaskan tempat berkhidmat sepertimana keputusan Mesyuarat Jemaah Menteri bertarikh 7 Mac 2016. Pelajar yang telah menamatkan pengajian boleh dikecualikan / dikurangkan kadar bayaran balik pinjaman bergantung kepada sektor perkhidmatan atau tempat berkhidmat seperti berikut:

- i. Sektor Awam - dikecualikan bayaran balik sepenuhnya;
- ii. *Government Link Company*: bayaran balik 25% daripada jumlah keseluruhan;

- iii. Syarikat swasta dalam negara : bayaran balik 50% daripada jumlah keseluruhan; dan
- iv. Selain yang dinyatakan : bayaran balik 100% daripada jumlah keseluruhan.

Walaupun bagaimanapun, selepas beberapa tahun pelaksanaannya, didapati PBU ini boleh menyebabkan pelajar menanggung beban hutang yang tinggi dan tempoh bayaran balik yang panjang terutama bagi pelajar yang melanjutkan pengajian ke luar negara disebabkan kos pengajian yang tinggi.

Justeru, JPA sedang dalam tindakan penambahbaikan mekanisme pinjaman daripada PBU berasaskan tempat berkhidmat kepada berasaskan merit kecemerlangan supaya pelajar tidak terbeban dengan hutang yang tinggi selepas tamat pengajian.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 25.11.2019 (ISNIN)

SOALAN

YB PUAN KASTHURIRAANI A/P PATTO [BATU KAWAN] minta **PERDANA MENTERI** menyatakan apakah status kes saham MAIKA setelah sekian lama dan apakah usaha pihak Kerajaan untuk memberikan keadilan kepada mangsa pelaburan ini dan adakah pihak-pihak yang terlibat akan dibawa ke muka pengadilan.

**JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JABATAN PERDANA MENTERI**

SPRM masih lagi menjalankan siasatan dan selaras dengan peruntukan seksyen 29 (4) Akta SPRM 2009, Suruhanjaya ini tidak dapat mendedahkan butiran siasatan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : YB TUAN OSCAR LING CHAI YEW [SIBU]

TARIKH 25 NOVEMBER 2019 (ISNIN)

:

SOALAN

Minta **PERDANA MENTERI** menyatakan adakah artikel 5 (i & ii) yang dinyatakan dalam Konvensyen Antarabangsa Penghapusan Diskriminasi Kaum (ICERD) tersebut bertentangan kepada kuasa autonomi imigresen Sarawak dan Sabah. Adakah artikel 5 (d)(vii) akan menjadi isu perkahwinan sama seks.

**JAWAPAN: YB TUAN MOHAMED HANIPA BIN MAIDIN
TIMBALAN MENTERI, DI JABATAN PERDANA MENTERI**

Tuan Yang di-Pertua,

1. Malaysia bukan Negara Pihak kepada *International Convention on the Elimination of All Forms of Racial Discrimination* (ICERD).
2. Artikel 5(d)(i) dan 5(d)(ii) ICERD memperuntukkan hak-hak sivil yang perlu dijamin oleh Negara Pihak iaitu hak kebebasan bergerak dan menetap di dalam sempadan negara dan hak untuk meninggalkan sesebuah negara, termasuk negaranya sendiri, dan untuk kembali ke negaranya.
3. Walaupun Malaysia bukan Negara Pihak kepada ICERD dan oleh yang demikian Artikel 5(d)(i) dan 5(d)(ii) ICERD tidak terpakai bagi Malaysia, namun Malaysia sentiasa komited dalam memenuhi komitmen antarabangsa sebagai salah sebuah negara anggota Pertubuhan

Bangsa-Bangsa Bersatu bagi memastikan hak asasi manusia termasuk hak kebebasan bergerak adalah terjamin selagi mana hak tersebut tidak bertentangan dengan Perlembagaan Persekutuan dan undang-undang domestik lain yang berkaitan.

4. Hak kebebasan bergerak bagi seseorang individu di Negara ini jelas diperuntukkan dalam Fasal (2) Perkara 9 Perlembagaan Persekutuan yang menyatakan bahawa tertakluk kepada Fasal (3) Perkara 9 Perlembagaan Persekutuan dan mana-mana undang-undang berhubung dengan keselamatan Persekutuan atau bahagiannya, ketenteraman awam, kesihatan awam, atau penghukuman pesalah, tiap-tiap warganegara berhak untuk bergerak dengan bebas di seluruh Persekutuan dan bermastautin di mana-mana bahagiannya.

5. Selanjutnya, Bab 2 Bahagian VII Akta Imigresen 1959/63 [*Akta 155*] mengandungi peruntukan khas berhubung dengan undang-undang imigresen di Sabah dan Sarawak sebagai unit yang berasingan daripada Semenanjung Malaysia. Peruntukan khas ini memberi kuasa kepada pihak berkuasa negeri Sabah dan Sarawak untuk memberikan arahan kepada Pengarah Imigresen Negeri Sabah dan Pengarah Imigresen Negeri Sarawak, antara lain, untuk tidak mengeluarkan permit atau pas kepada mana-mana orang atau kumpulan orang yang tertentu, dan membatalkan sebarang permit, pas atau sijil yang telah dikeluarkan kepada orang yang tertentu atau menganggap orang yang tertentu itu sebagai imigran yang tidak dikehendaki.

6. Artikel 5(d)(vii) ICERD memperuntukkan kewajipan Negara Pihak untuk melarang dan menghapuskan diskriminasi perkauman serta menjamin hak kesamarataan setiap orang di sisi undang-undang terhadap kebebasan pemikiran, pegangan dan agama. Sebagaimana yang telah dinyatakan, Malaysia bukan Negara Pihak kepada ICERD dan oleh itu Artikel 5(d)(vii) ICERD juga tidak terpakai bagi Malaysia.

7. Hak kebebasan beragama seseorang individu di Negara ini diperuntukkan dalam Fasal (1) Perkara 11 Perlembagaan Persekutuan yang menyatakan bahawa setiap orang berhak menganuti dan

mengamalkan agamanya, dan tertakluk kepada Fasal (4) Perkara 11 Perlembagaan Persekutuan, boleh mengembangkannya.

8. Undang-undang yang terpakai bagi orang bukan Islam berhubung dengan perkahwinan, perceraian dan perkara-perkara yang berkaitan dengannya ialah Akta Membaharui Undang-Undang (Perkahwinan dan Perceraian) 1976 [*Akta 164*], manakala undang-undang keluarga Islam yang diperuntukkan oleh setiap Negeri terpakai bagi orang Islam.

9. Sebagaimana yang diperuntukkan dalam perenggan 69(d) Akta Membaharui Undang-Undang (Perkahwinan dan Perceraian) 1976, suatu perkahwinan bagi orang bukan Islam hendaklah menjadi tidak sah jika pihak-pihak kepada perkahwinan itu masing-masing bukan merupakan seorang lelaki dan perempuan.

10. Berdasarkan undang-undang keluarga Islam yang diperuntukkan oleh setiap Negeri, suatu perkahwinan itu hendaklah memenuhi hukum Syarak yang ditetapkan iaitu antara seorang lelaki dan perempuan. Oleh itu, mengikut ketetapan hukum Syarak, perkahwinan sesama jantina adalah tidak sah.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT

PERTANYAAN : LISAN

**DARIPADA : DATUK SERI PANGLIMA DR. MAXIMUS
JOHNITY ONGKILI [KOTA MARUDU]**

TARIKH : 25 NOV 2019 (ISNIN)

SOALAN

Datuk Seri Panglima Dr. Maximus Johnity Ongkili [Kota Marudu] minta **MENTERI INDUSTRI UTAMA** menyatakan apakah fokus terkini program-program R&D bagi sektor kelapa sawit, apakah hasil program-program tersebut dan impak kepada industri sawit dari segi usaha negara mempertahankan "competitive edge" dalam sektor ini. Bagi tahun 2016, 2017, 2018 dan 2019 berapa jumlah peruntukan telah digunapakai.

JAWAPAN

Tuan Yang Di-Pertua,

Kementerian melalui Lembaga Minyak Sawit Malaysia (MPOB) sedang menfokuskan penyelidikan dan pembangunan (R&D) bagi menghasilkan bahan tanaman berkualiti dalam usaha meningkatkan hasil dan kualiti sawit.

Dalam hal ini, beberapa siri baka baharu terpilih yang berpotensi tinggi hasil penyelidikan biji benih dan klon kultur tisu telah diperkenalkan yang berkeupayaan untuk menghasilkan minyak sebanyak 6 hingga 10 tan/hektar/tahun. MPOB juga sedang berada pada fasa terakhir penyelidikan untuk pengeluaran bahan tanaman dengan ciri sasaran seperti kerenekan, tandan panjang, rintang penyakit dan sebagainya. Bahan tanaman berkualiti ini akan digunakan dalam penanaman semula bagi menggantikan tanaman yang tidak lagi produktif dan seterusnya dapat meningkatkan pengeluaran sawit negara serta pendapatan penanam sawit. Selain itu, kit diagnostik 'SureSawit' iaitu satu mekanisme penyaringan kontaminasi secara komprehensif telah dibangunkan dan digunapakai bagi menjamin kualiti bahan tanaman yang dihasilkan. Kit ini berupaya mengesan kontaminasi bahan tanaman di peringkat tapak semaian dan seawal sebelum percambahan.

MPOB juga giat menjalankan R&D bagi meningkatkan kecekapan pemprosesan minyak sawit bagi meningkatkan kualiti serta menjamin keselamatan produk sawit yang dihasilkan. Ini termasuk kajian bagi mengurangkan tahap 3-MCPDE dalam rantai pemprosesan minyak sawit. Bagi tujuan tersebut, Kerajaan telah memperuntukkan dana penyelidikan untuk membantu penggiat industri mengurangkan pembentukan 3-MCPDE melalui kajian lapangan melibatkan kilang sawit terpilih, kilang penapis dan penyedia teknologi yang akan mengoptimumkan pemprosesan minyak sawit untuk mencapai tahap 3-MCPDE yang rendah.

Bagi membangunkan sektor hiliran, aktiviti R&D difokuskan dalam penghasilan produk-produk baharu serta memberi nilai tambah kepada produk hiliran sawit. Antaranya adalah aplikasi biodiesel sawit dalam sektor industri dan automotif. Sehingga kini, MPOB telah berjaya melaksanakan pengadunan biodiesel B10 (adunan 10% biodiesel sawit dan 90% diesel

petroleum) bagi sektor pengangkutan dan B7 bagi sektor industri. Kajian sedang diteruskan untuk pengadunan lebih tinggi sehingga B30 yang melibatkan kolaborasi dengan universiti-universiti di Malaysia, China dan Jepun. Program ini adalah salah satu langkah penstabilan stok dan harga minyak sawit. Selain itu, kajian penyelidikan klinikal berkenaan pengambilan minyak sawit, minyak sawit merah dan juga fitonutrien sawit terutamanya vitamin E tokotrienol yang bertujuan untuk menilai kesan kepada kesihatan juga sedang dijalankan. Hasil kajian ini dapat menyokong usaha promosi minyak sawit, minyak sawit merah dan vitamin E tokotrienol sebagai produk yang mempunyai kandungan antioksidan tinggi serta memberi pelbagai kebaikan dari segi kesihatan.

Tuan Yang Di-Pertua,

Secara keseluruhannya, dari tahun 2016 sehingga September 2019, lebih daripada RM40.1 juta telah dibelanjakan bagi program-program R&D. Banyak daripada hasil program-program R&D ini telah dipindahkan dan dikongsi bersama penggiat industri dan dikomersialkan. Ini telah menyumbang kepada peningkatan pendapatan penggiat industri serta kemasukan pelaburan asing dan tempatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN TAN KOK WAI [CHERAS]

TARIKH : 25 NOVEMBER 2019 (ISNIN)

SOALAN

Minta **MENTERI WILAYAH PERSEKUTUAN** menyatakan nama setiap tanah perkuburan, kolumbarium dan krematorium awam dan swasta untuk setiap kaum dan agama di Kuala Lumpur dan berapa banyak peruntukan diberikan untuk pembangunan dan operasi setiap tanah perkuburan, kolumbarium dan krematorium awam untuk setiap tahun sejak lima tahun yang lepas.

JAWAPAN

Tuan Yang di-Pertua,

Untuk makluman Yang Berhormat Cheras, terdapat 19 Tanah Perkuburan Islam di Wilayah Persekutuan Kuala Lumpur (WPKL) yang terdiri dari 2 Tanah Perkuburan Islam di bawah selenggaraan Dewan Bandaraya Kuala Lumpur (DBKL) dan 17 Tanah Perkuburan Islam di bawah selenggaraan Jabatan Agama Islam Wilayah Persekutuan (JAWI).

Terdapat 12 tanah perkuburan pelbagai agama lain yang mana 1 Tanah Perkuburan Kristian di Cheras di bawah selenggaraan DBKL, yang lainnya diuruskan dan diselenggara oleh pihak persatuan di bawah pendaftaran *Register Of Society* (ROS). Terdapat 5 Krematorium yang beroperasi di Kuala Lumpur yang mana 1 Krematorium Awam yang diselenggara oleh DBKL di Cheras. Lagi 4 Krematorium Swasta dikendalikan oleh pihak persatuan. Terdapat 8 'Columbarium' Swasta di Kuala Lumpur yang dikendalikan oleh pihak persatuan.

Untuk makluman Yang Berhormat Cheras juga, DBKL menggunakan peruntukan dalaman untuk pengoperasian Tanah Perkuburan Islam Jalan Ampang dan Cheras, Tanah Perkuburan Kristian Cheras dan Krematorium Awam di Cheras. Tanah Perkuburan Islam Jalan Ampang dan Cheras diperuntukan RM40,000 setahun untuk kerja-kerja pembersihan dan potongan rumput manakala peruntukan sebanyak RM60,000 setahun untuk kerja-kerja pembersihan dan potongan rumput di Tanah Perkuburan Kristian, Cheras.

Manakala kos operasi dan penyelenggaraan Krematorium Awam Jalan Kuari, Cheras adalah sejumlah RM8.39 juta bagi tempoh tahun 2014-2018. Semasa ini, DBKL tiada mengendalikan apa-apa juga fasiliti 'Columbarium'.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI HISHAMMUDDIN BIN TUN
HUSSEIN [SEMBRONG]**

TARIKH : 25 November 2019 (ISNIN)

SOALAN

Minta **MENTERI HAL EHWAL EKONOMI** menyatakan jumlah hasil yang diperoleh Kerajaan serta hasil pelepasan aset-aset Persekutuan yang dimasukkan ke dalam Kumpulan Hasil Disatukan memandangkan Kerajaan telah pun melepaskan pelbagai aset kewangan yang melibatkan Khazanah Nasional semenjak pasca PRU 14 untuk memperbaiki kedudukan fiskal Kerajaan Persekutuan.

JAWAPAN

Tuan Yang di-Pertua,

1. Untuk makluman Yang Berhormat, penjualan atau pelupusan aset adalah aktiviti perniagaan yang lazim dilakukan oleh Syarikat Pelaburan Berkaitan Kerajaan (GLIC) seperti Khazanah Nasional Berhad (Khazanah), Kumpulan Wang Simpanan Pekerja (KWSP) dan Permodalan Nasional Berhad (PNB).

2. Sejak Mei 2018 sehingga Jun 2019, Khazanah telah melaksanakan pelupusan berjumlah kira-kira RM18.8 bilion, iaitu RM3.2 bilion (antara Mei – Disember 2018) dan RM15.6 (antara Januari – Jun 2019). Hasil daripada pelupusan yang dilaksanakan oleh Khazanah sepanjang tahun 2018 dan 2019, Khazanah telah berjaya mengurangkan hutang kira-kira RM8 bilion daripada RM55 bilion kepada RM47 bilion, dan dijangka akan

terus dikurangkan kepada RM35 bilion hingga RM40 bilion dalam tempoh jangka sederhana.

3. Bagi Tahun Kewangan 2019, Khazanah menjangkakan akan kembali mencatatkan keuntungan sekitar RM5 bilion, berbanding kerugian RM6.3 bilion pada Tahun Kewangan 2018.

4. Hasil daripada pelupusan tersebut tidak dimasukkan ke dalam Kumpulan Wang Disatukan ataupun digunakan untuk membayar hutang Kerajaan. Sebaliknya Kerajaan hanya menerima pendapatan dalam bentuk dividen tahunan dan cukai.

5. Pada tahun 2018, Khazanah telah mengisytiharkan serta membayar dividen berjumlah RM1.5 bilion dan cukai sebanyak RM249 juta kepada Kerajaan.

6. Khazanah telus dalam pelaporan berkaitan aktiviti pelaburan dan pelupusan. Khazanah melaporkan prestasi kewangan, aktiviti pelaburan dan pelupusannya serta hala tuju dan tumpuan masa depan. Khazanah menerbitkan laporan tahunan serta penyata kewangan yang jelas memaparkan aktiviti pelaburan dan pelupusan serta prestasi kewangannya untuk tatapan umum.

Sekian, terima kasih.